



Broj: 01-144/12
Vareš, 31.07. 2012. godine

Z A P I S N I K
s 39. sjednice Općinskog vijeća Vareš,
održane 31.05. 2012. godine

Josip Malbašić – predsjedavajući Općinskog vijeća Vareš, otvorio je 39. sjednicu s početkom u 9,00 sati, u velikoj sali Općine Vareš.

Izvršena je prozivka vijećnika.

Prisutni vijećnici: Ismet Abdulahović, Dženana Bešić, Tajiba Brkić, Dženana Hafizović, Izudin Ibrišimović, Kenan Kamenjaš, Džemo Kevrić, Ešref Likić, Ivan Lučić, Josip Malbašić, Željko Matić, Mario Mirčić, Majda Muftić, Nihad Parić, Mato Pavić, Elvir Rožajac, Jasmin Salketić, Dragan Sekulić, Nikola Šimić i Jelena Zlobec.

Odsutni: Milan Knežević – zamjenik predsjedavajućeg.

Pored vijećnika sjednici prisustvuju: Općinski načelnik - Hamdo Fatić, sekretar Općinskog vijeća - Leon Pavlović, pomoćnici općinskog načelnika, zamjenica općinskog pravobranioca – Elma Brčić, ispred Službe za privredu i finansije – Brano Šurkić i Dragan Orozović, ispred Službe za civilnu zaštitu - Ismet Kozlić, poslanik u Skupštini ZDK - Fahrudin Brkić, predsjednici političkih stranaka, ispred JKP d.o.o. Vareš - direktor Zafer Kamenjaš i predsjednik Skupštine Grga Vukančić i predsjednik MZ Vareš – Enver Fetišević.

Sekretar Općinskog vijeća izvijestio je Vijeće o realizaciji Zaključaka s 38. sjednice OV održane 26.04.2012. godine i dostavljenim odgovorima na vijećnička pitanja. Općinsko vijeće na 38. sjednici donijelo je 5 Zaključka. Od tog broja 2 Zaključka su realizovana, 2 Zaključka su u toku realizacije i za 1 Zaključak Služba nema podataka a odnosi se na primjenu i provođenje ustavnih presuda. Na 38. sjednici OV postavljeno je 12 vijećničkih pitanja. Na svih 12 vijećničkih pitanja nadležni su podnosiocima dostavili odgovor u pisanoj formi.

Općinski načelnik Hamdo Fatić u okviru aktuelne problematike na području općine Vareš, izvijestio je Vijeće da je 28.05.2012. godine prodat Rudnik olova, cinka i barita u stečaju u iznosu od 1.250.000 KM. Kupac je firma MM Project d.o.o. Kreševo. Svi oni koji žele znati nešto više informacija u vezi prodaje, mogu se obratiti vijećniku Mariu Mirčić s obzirom da je učestvovao u prodaji. Dana 28.05.2012. godine pokrenut je postupak i izabran izvođač na prvoj mini hidrocentrali na rijeci Stavnji. Odabrana je najpovoljnija firma Eko-Energy d.o.o. Tešanj, za druge dvije mini hidrocentrale nije bilo validnih ponuda. Također je izvijestio Vijeće da je Vlada ZDK za sanaciju troškova i probleme zimskog održavanja u periodu februar-mart tekuće godine, dodijelila Općini Vareš finansijska sredstva u iznosu od 60.000 KM.

Predsjedavajući OV pozvao je vijećnike koji nisu zadovoljni sa dobivenim odgovorom na vijećnička pitanja ili imaju dopunska pitanja, da se izjasne.

- **Elvir Rožajac** – Nezadovoljan je odgovorom koji je dobio na postavljeno vijećničko pitanje na 38. sjednici OV a u vezi javne česme Toplik (ispravnost vode i postavljena tabla). Traži da mu se ponovo odgovori šta će se uraditi?

- **Ismet Abdulahović** – Nezadovoljan je odgovorom koji je dobio na postavljeno vijećničko pitanje na 38. sjednici a u vezi postavljanja signalizacije zabrane izvoza balvana putem Dabravine-Luke. Smatra da odgovor nije tačan i traži da mu se ponovo odgovori na pitanje sa tačnim informacijama.

U vezi postavljenog pitanja koje se odnosi na utuživanje građana MZ Dabravine od strane JKP d.o.o. Vareš, izvijestio je da je odgovor dobio od JKP d.o.o. Vareš. Napominje da odgovor traži od Općinskog načelnika i Općinskog vijeća.

- **Jelena Zlobec** – Nije zadovoljna u potpunosti sa odgovorom koji je dobila na postavljeno vijećničko pitanje na 38. sjednici a u vezi rješenja za naknadu za korištenje gradskog građevinskog zemljišta i komunalne naknade.

(Vijećnička pitanja)

Elvir Rožajac

1. Šta će se uraditi po pitanju asfaltiranja gradskih ulica i pristupa katoličkom groblju i greblju Glavica?
2. Dokle se došlo i šta su nadležni u Kantonu ili Federalnom ministarstvu zdravstva odgovorili po pitanju liječenja građana općine Vareš u KC Sarajevo?

Tajiba Brkić

3. Može li se poslati upit BH Telecomu ured Zenica da se priključe na internet mjesne zajednice općine Vareš, tamo gdje to nije urađeno?
4. Kada će se završiti asfaltiranje ulice Glavica i uređenje puta prema gradskom groblju?

Mato Pavić

5. Traži od Općinskog načelnika, ako može, da na današnjoj sjednici odgovori da li ima informaciju kada će se nastaviti asfaltirati ulice u gradu koje su započete i regionalni put?

Džemo Kevrić

6. Može li se šta uraditi na pripremi prostorija za predstojeće Lokalne izbore u svim mjesnim zajednicama, da se prezentuje gdje i kome se obratiti u vezi održavanja predizbornih skupova?
7. Kada će započeti i rok završetka lokalnog puta Striježevo-Kadarići u dužini od oko 3 km? Napominje da traži pismene odgovore na postavljena vijećnička pitanja, ako u međuvremenu ne dođe do realizacije.

Ivan Lučić

8. Kada ćemo dobiti propisane dokumente koje je Općinski načelnik potpisao kroz Zaključke o izvršenju budžeta općine Vareš za 2012. godinu?
9. a) Kada ćemo dobiti Izvještaj o tromjesečnom izvršenju budžeta općine Vareš?

b) Da li je izvyješteno Ministarstvo ZE-DO kantona o utrošku sredstava za prva tri mjeseca kao što je propisano Pravilnikom o finansijskom izvještavanju i godišnjem obračunu budžeta u FBiH?

Općinski načelnik dao je usmene odgovore na neka postavljena vijećnička pitanja.

- U vezi postavljenog pitanja vijećnice Tajibe Brkić koje se odnosi na uspostavljenje internetske mreže za mjesne zajednice, Općinski načelnik je odgovorio da je postupak u toku, neke mjesne zajednice su završene, a na osnovu obećanja nadležnih, i ostale mjesne zajednice ubrzo bi trebale dobiti internetsku mrežu.
 - U vezi postavljenih pitanja koja se odnose na završetak asfaltiranja gradskih ulica odgovorio je da će se nastaviti sa radovima odmah kada se osiguraju potrebna sredstva.
 - U vezi pitanja koje se odnosi na regionalni put dao je odgovor da ima obećane da će se tamo izaći i da će se tokom ljeta završiti dionica puta do Ivančeva.
- Na ostala postavljena vijećnička pitanja, bit će dostavljeni pismeni odgovori.

Predsjedavajući OV stavio je na raspravu zapisnik sa 38. sjednice OV .

Nije bilo primjedbi i predsjedavajući OV stavio je na izjašnjanje zapisnik sa 38. sjednice OV i nakon izjašnjanja vijećnika konstatovao da je **zapisnik sa 38. sjednice OV jednoglasno usvojen.**

Na raspravu je stavljen prijedlog dnevnog reda iz poziva za 39. sjednicu OV.

Za riječ se javio Općinski načelnik i izjasnio se da tačku 1. Prijedlog Odluke o prodaji poslovnog prostora povlači sa dnevnog reda 39. sjednice, o čemu je dao i objašnjenje.

Vijećnica Dženana Bešić ispred Kluba SDA javila se za riječ i u svom izlaganju izjasnila se da prihvata prijedlog Općinskog načelnika.

Nije više bilo primjedbi niti prijedloga za izmjenu ili dopunu dnevnog reda 39. sjednice OV.

Predsjedavajući OV stavio je na izjašnjanje prijedlog dnevnog reda iz poziva za 39. sjednicu OV sa izmjenom i nakon izjašnjanja konstatuje da je **jednoglasno usvojen s l i j e d e ć i**

D n e v n i r e d

1. **Prijedlog Rješenja o mijenjanju rješenja Općinskog vijeća Vareš broj: 01-78/12 od 29.03.2012. godine**
2. **Prijedlog Zaključka o davanju saglasnosti za dodjelu koncesije za istraživanje i eksploataciju mineralnih resursa –olova, cinka, barita i srebra na lokalitetu „Rupice-Juraševac Brestić“, općina Vareš.**
3. **Izvještaj o radu Savjeta Mjesnih zajednica sa područja općine Vareš za 2011. godinu.**
4. **Izvještaj o realizaciji strategije razvoja (2006-2015) Općine za period od 2006-2012.**
5. **Izvještaj o radu i finansijskom poslovanju JKP d.o.o. Vareš za 2011. godinu.**
6. **Informacija o provođenju Odluka Općinskog vijeća Vareš o davanju na upravljanje i korištenje vodovoda Mjesnih zajednica, JKP d.o.o. Vareš.**
7. **Informacija o provođenju lokalnog ekološkog akcionog/akcijskog plana za općinu Vareš u 2011. godini.**
8. **Informacija o minsko-eksplozivnim sredstvima i poduzetim aktivnostima Općine na deminiranju prostora na području općine Vareš.**

9. Izvještaj o provođenju trogodišnjeg Općinskog akcijskog plana za kontinuirano unapređenje općinske uprave i pružanje usluga u suradnji s Projektom upravne odgovornosti.
10. Plan razvoja poljoprivredne proizvodnje na području općine Vareš.
11. Tekuća pitanja.

Ad. 1.

*(Prijedlog Rješenja o mijenjanju rješenja
Općinskog vijeća Vareš broj:01-78/12 od 29.03.2012. godine.)*

Predlagač nije imao dodatno obrazloženje za ovu tačku dnevnog reda.

Nije bilo rasprave po ovoj tački dnevnog reda i predsjedavajući OV stavio je na izjašnjavaње Prijedlog Rješenja o mijenjanju rješenja Općinskog vijeća Vareš broj: 01-78/12 od 29.03.2012. godine.

Nakon izjašnjavaња vijećnika predsjedavajući OV je konstatovao da je sa **20 glasova „ZA“ usvojeno**

***Rješenje o mijenjanju rješenja Općinskog
vijeća Vareš broj: 01-78/12 od 29.03.2012. godine.***

Ad. 2.

*(Prijedlog Zaključka o davanju saglasnosti za dodjelu
koncesije za istraživanje i eksploataciju mineralnih
resursa – olova, cinka, barita i srebra na lokalitetu
„Rupice-Juraševac Brestić“, općina Vareš.)*

Otvorena je rasprava u kojoj je Općinski načelnik dao dodatno pojašnjenje za ovu tačku dnevnog reda.

U raspravi su učestvovali i vijećnici Elvir Rožajac i Mario Mirčić koji je predložio slijedeći amandman na Prijedlog Zaključka:

- u tački I. stav 1. iza riječi „općina Vareš.“ briše se tačka i dodaju se nove riječi „ , kupcu DP Rudnik olova cinka i barita-u stečaju Vareš, ukoliko isti iskaže interes, u skladu sa članom 28. Zakona o koncesijama (Sl. novine FBiH br. 40/02 i 61/06).“

- u tački I. dodaje se novi stav 2. koji glasi: „Ukoliko isti ne iskaže interes dodjela koncesije će se vršiti putem javnog poziva.“

- dosadašnji stav 2. postaje stav 3.

Predsjedavajući OV pozvao je Općinskog načelnika da se izjasni o predloženom amandmanu vijećnika Maria Mirčić.

Općinski načelnik izjasnio se da prihvata predloženi amandman.

Predsjedavajući OV je konstatovao da je prihvaćeni amandman postao sastavni dio Prijedloga Zaključka.

Predsjedavajući OV stavio je na izjašnjavaње Prijedlog Zaključka o davanju saglasnosti za dodjelu koncesije za istraživanje i eksploataciju mineralnih resursa – olova, cinka, barita i srebra na lokalitetu „Rupice-Juraševac Brestić“, općina Vareš.

Nakon izjašnjavaња vijećnika predsjedavajući OV je konstatovao da je sa **19 glasova „ZA“ i 1 „SUZDRAŽANIM“ glasom usvojen**

**Zaključak o davanju saglasnosti za dodjelu koncesije za istraživanje
i eksploataciju mineralnih resursa-olova, cinka, barita
i srebra na lokalitetu „Rupice-Juraševac Brestić“, općina Vareš.**

Ad. 3.

*(Izveštaj o radu Savjeta Mjesnih zajednica
sa područja općine Vareš za 2011. godinu.)*

Predlagač nije imao dodatno objašnjenje za ovu tačku dnevnog reda.

Otvorena je rasprava u kojoj su svoje prijedloge, primjedbe, sugestije i mišljenja iznijeli vijećnici: Kenan Kamenjaš, Džemo Kevrić, Jasmin Salketić, Ismet Abdulahović, Nihad Parić, Željko Matić, Dženana Bešić, Tajiba Brkić, Ivan Lučić, Nikola Šimić, Mario Mirčić, predsjednik političke stranke Zdravko Marošević, predsjedavajući OV Josip Malbašić i pomoćnik načelnika Rusmir Berberović koji je dao dodatno pojašnjenje.

Zaključena je rasprava i predsjedavajući OV stavio je na izjašnjavanje slijedeći prijedlog

Zaključka

- **Predlaže se Vijeću da se na današnjoj sjednici ne izjašnjava o Izveštaju o radu Savjeta Mjesnih zajednica sa područja općine Vareš za 2011. godinu i da nadležna Služba pripremi analitiku dostavljenih Izveštaja i prijedlog Zaključaka na osnovu današnje rasprave vođene po ovoj tački dnevnog reda i dostavi ih Vijeću.**

Nakon izjašnjavanja vijećnika predsjedavajući OV je konstatovao da predloženi Zaključak sa **8 glasova „ZA“**, **3 glasa „PROTIV“** i **9 „SUZDRŽANIH“ glasova nije usvojen.**

Predsjedavajući OV stavio je na izjašnjavanje Izveštaj o radu Savjeta Mjesnih zajednica sa područja općine Vareš za 2011. godinu.

Nakon izjašnjavanja vijećnika predsjedavajući OV je konstatovao da je sa **14 glasova „ZA“** i **6 glasova „PROTIV“ usvojen**

*Izveštaj o radu Savjeta Mjesnih zajednica
sa područja općine Vareš za 2011. godinu.*

Ad. 4.

*(Izveštaj o realizaciji strategije razvoja
(2006-2015) Općine za period od 2006-2012.)*

Predlagač nije imao dodatno objašnjenje za ovu tačku dnevnog reda.

Otvorena je rasprava u kojoj su svoje prijedloge, primjedbe, sugestije i mišljenja iznijeli vijećnici: Elvir Rožajac, Ivan Lučić, Jasmin Salketić, Ismet Abdulahović, Nikola Šimić, Mario Mirčić, pomoćnik načelnika Rusmir Berberović i ispred predlagača Brano Šurkić koji se izjasnio da će napomene iznesene u raspravi od strane vijećnika biti uvrštene u Izveštaj ukoliko Vijeće na današnjoj sjednici usvoji Izveštaj.

Zaključena je rasprava i predsjedavajući OV stavio je na izjašnjavanje Izveštaj o realizaciji strategije razvoja (2006-2015) Općine za period od 2006-2012.

Nakon izjašnjavanja vijećnika, predsjedavajući OV je konstatovao da sa **9 glasova „ZA“**, **4 glasa „PROTIV“** i **6 „SUZDRŽANIH“ glasova nije usvojen**

*Izveštaj o realizaciji strategije razvoja
(2006-2015) Općine za period od 2006-2012.*

Ad.5.

(Izveštaj o radu i finasijskom poslovanju JKP d.o.o. Vareš za 2011. godinu.)

Predsjedavajući OV Josip Malbašić: Da li predlagač ima potrebu za dopunskim obrazloženjem?... Nema, dobro. Otvaram raspravu.

Predsjedavajući OV Josip Malbašić: Gospodin Ismet Abdulahović.

Vijećnik Ismet Abdulahović: Evo ja ću se malo, ovaj, osvrnuti na ovaj Izveštaj o radu i finasijskom poslovanju JKP Vareš za 2011. godinu. Izveštaj kao i svaki izvještaj sadrži ono što treba da sadrži međutim, ovaj, mene interesuje malo više iz malo više iz ovih kartica prihoda da malo, ovaj, predlagač bude konkretniji što se tiče prihoda. Drugo što bi želio da kažem, na kraju ovdje, ovaj, nema iznosa u prihodima niti u sveukupnim troškovima na 5. tj. na 6. stranici, ili ja to nisam primijetio. Znači, to je Izveštaj za 2011. godinu, pa na karaju ovamo nema to što tražim. Dalje, analiza problematike poslovanja na 10. stranici pitanje spornih odluka za vodovod Dabravine. Mislim da ovo ne bi trebalo da stoji u Izveštaju, te sporne odluke, ovaj, jer nema spornih odluka. Ovdje je odluka koju je donijelo Općinsko vijeće i presuda suda koju je donio Sud, prema tome, ovo ne bi trebalo da stoji ovdje u ovom Izveštaju, nema spornih odluka, nikakvih, ovu je donijelo odluku Općinsko vijeće, Sud poništio i kraj priče. Dalje što se tiče Nadzornog odbora preduzeća, Izveštaj o radu odbora, vidio sam na par mjesta, 40. sjednica održana 08.02.2011. godine u potpunosti je bila posvećena razmatranju Informacije o problemima pri realizaciji ranije Odluke Nadzornog odbora do koje je došlo podnošenjem anonimnih dojava u kojima je naveden niz neistinitih proizvoljnih i paušalnih činjenica, vezano za aktivnosti na iskopu i prodaji dijela devastiranog i neupotrebljivog cjevovoda vodovoda Bukovica. Mislim da ovo ne bi trebalo ovdje da stoji, jer je ovo Kolegij OV pokrenuo, jer sam bio prisutan umjesto Kevrić Džeme i ovaj mislim da je ovo pokrupno ovdje što stoji u Izveštaju Nadzornog odbora, ipak Kolegij OV je nešto malo drugo u odnosu na ovo što ste Vi ovdje napisali. Dalje, na sjednici održanoj 30.05.2011. godine najviše se raspravljalo o raspisivanju konkursa za izbor i imenovanje direktora, zahtjev gdje će se pružanje komunalnih usluga korisnicima Dabravine obavljati u skladu sa važećim propisima i aktima. Tri odluke i jedan zaključak. Mislim da OV donosi odluke po kojima treba da radi JKP, prema tome ovo su sve stvari koje su ovdje, po meni, nabacane. Vidio sam ovdje takođe da stoji... kaže ..tu je takođe jednoglasno donesena odluka kojim se Uprava obavezala da pokrene sudski postupak protiv Savjeta MZ Dabravine. Nije tačno da se pokrenula odluka protiv Savjeta MZ Dabravine nego je pokrenuta odluka protiv pojedinih građana MZ Dabravine, koji nisu baš u lijepim očima direktoru JKP i onih ostalih koji su pravili ove stvari, znači zajedno sa Policijskom stanicom i ne znam načelnikom općine i ostalim. Prema tome, ovaj, ja moram reći da za mene ovaj Izveštaj o poslovanju za 2011. godinu, zajedno sa ovim Nadzornim odborom nije prihvatljiv i ovo ovdje stoji niz neistina od ovaj, kao što sam već naveo par primjera, mislim da ovo ne bi trebalo da stoji u Izveštaju. Toliko, hvala.

Predsjedavajući OV Josip Malbašić: Zahvaljujem gospodinu Abdulahoviću. Izvolite dalje. Gospodin Jasmin Salketić.

Vijećnik Jasmin Salketić: Evo ja se izvinjavam, malo više izlazim danas, ali tematika je takva, pa ... pročitao sam ovaj Izveštaj. Da je sam Izveštaj kao Izveštaj došao u materijalima za Vijeće, ja se ne bi dvoumio, sigurno bi ga podržao. Međutim, prilog iz Izveštaja, Izveštaja Nadzornog odbora, iziritirao me je tako da ću dat par konstatacija, postaviti par pitanja ljudima koji su odgovorni i koji tu sjede. Ovaj, a uglavnom ova pitanja bi se odnosila na predsjednika Nadzornog odbora, međutim, vidim tu direktora preduzeća i predsjednika Skupštine. Šta me... ja sam dobio danas odgovor na vijećničko pitanje. Nisam htjeo, kolega Abdulahović je izašao pošto je odgovor isti, nisam htjeo izlaziti da se ne bi ponavljao, ali sam Izveštaj Nadzornog odbora i odgovor na moje vijećničko pitanje je stvarno u koliziji. Pa nek uzmu, nek malom to izanaliziraju, da vide da sami sebe pobijaju u nekim stvarima. Šta me nervira... nervira me prvo, ja ne znam ko to ima pravo da ne poštuje odluke suda i volio bi ovdje sad da iskoristimo priliku, imamo tu predsjednika Skupštine, znači direktora JKP, da nam objasne, evo mi smo tu, patimo se sa ovim ima već dvije godine, da nam objasne, da mene razuvjere ovdje javno da ta odluka suda nije legalna i da i ja više klapnem ušima i da više ne govorim na tu temu. Onaj, ... moje pitanje, na 7. sjednici, to je onaj prilog od Nadzornog odbora, koja je

održana 08.09.2011. godine donesena je odluka, znači ne poštuje se odluka suda, oni i ne znaju za odluku suda, kroz vijećničko pitanje i odgovor na moje vijećničko pitanje, ovaj, zbog čega su donijeli Odluku o paušalnoj naplati, onaj, vode u Dabravinama kad evo zna, direktor Kamenjaš zna koliko ima ugrađenih vodomjera, znači trebala bi se voda naplaćivati na osnovu utrošene. Pa volio bi, eto to je prvo pitanje. E na 9. sjednici koja je održana 11.10.2011. godine, ovdje ću se ponoviti za kolegom Abdulahovićem, pokrenut je sudski postupak protiv Savjeta MZ Dabravine radi namirenja troškova po osnovu ulaganja u vodovod u Dabravinama. Ovaj, htio bi samo da potvrdim ono što je rekao kolega Abdulahović. To nije tačno, tuženo je 10 ljudi, Savjet MZ Dabravine broji 7 ljudi, znači da nije to. Ima ljudi koji su u Savjetu MZ koji nisu tuženi, a ima ljudi koji jednostavno, ja ne znam ko vodi u toj firmi tu politiku i ko gleda šta se radi. Mislim da razumijete, ima ljudi koji žive u MZ Dabravine koji uopšte nisu priključeni na tu vodu, koji su tuženi. Mislim, veze s vezom nema, znači neko je od oka klepio, čovjek mi se sviđa ne sviđa. Mislim, ja bi stvarno volio a mi to direktor ovdje objasni, bespotrebno dolazi do razmirica malo većih u mjesnoj zajednici. Kad stvari ne stoje. Imamo dva čovjeka, komšija koji uopšte nemaju tu vodu, ljudi dobili tužbe, mislim stvarno veze s vezom nema. I meni je stvarno žao. Ovaj, što se tiče rada firme Komunalnog preduzeća, mi znamo da je to firma uspješna, u ovakvim uslovima u Varešu odraduje svoje poslove kvalitetno. Evo, odvoz smeća, mislim ja, treba biti nečovjek pa reći da neke stvari nisu u redu, da nisu regularne. Međutim, ja ove stvari ne mogu podnijeti, ja kao čovjek, pedeset i nešto mi je godina nikad u životu na sudu nisam bio. Zadnju godinu dana dobio sam tri tužbe od Suda u Visokom. Mislim, stvarno volio bi da mi se pojasne neke stvari. Eto toliko.

Predsjedavajući OV Josip Malbašić: Zahvaljujem gospodinu Salketiću, izvolite dalje. Gospodin Ivan Lučić.

Vijećnik Ivan Lučić: Obzirom da u prilogu Izvještaja o radu i poslovanju JKP Vareš imamo i Izvještaj ovlaštenog revizora u kom je navedeno da je sve knjiženo korektno, uredno, kako to zahtijevaju propisi, da je urađeno tako i na krajnji rezultat iz finansijskog izvještaja vidimo da je preduzeće u ovim uslovima, ovakvim kakvi jesu, poslovalo uspješno, Klub vijećnika SDP će podržati ovaj Izvještaj, glasaće za usvajanje. A ja lično u svoje lično ime mogu reći da sam zadovoljan uslugama koje pruža JKP i mogu im samo izraziti zahvalnost, jer u svim ovim vremenima, pa i ovdje kad je bila elementarna nepogoda, mi nismo bili zakrčeni smećem, a imali smo priliku da vidimo šta se dešavalo u većim gradovima, šta se desilo sa Sarajevom, šta se desilo sa Travnikom, sa drugim mjestima. Prema tome, u tako teškim uslovima se obavljalo to i pružale usluge građanima. I iz tog razloga, Klub vijećnika će glasati za usvajanje Izvještaja.

Predsjedavajući OV Josip Malbašić: Zahvaljujem gospodinu Lučiću. Izvolite dalje. Gospođa Zlobec.

Vijećnica Jelena Zlobec: Ja sam davno ovdje, ne znam na kom Vijeću i kom skupu, rekla da direktno u stvari direktoru preduzeća, da smatram da je odličan, da je odličan menadžer. To sam rekla, ali istina dodala sam još nešto ali to on zna šta je. Prema tome, i danas kažem, šteta što nije na nekom drugom mjestu. Međutim, ne mogu da se složim s time kad ovdje negdje, negdje su napisali, da smo mi krivci za ovih, ne znam ni ja, ako nije sto hiljada maraka, ovo što se dešava sa Dabravinama, da je Općinsko vijeće i Općina. I to je činjenica, jer smo mi i na Vijeću poslije toga, bilo je priča o tome kako treba nadoknaditi tu štetu, treba Općina da nadoknadi i mi naravno da smo krivci. Međutim, ja bi htjela samo da Vam kažem o ovom poslovanju jer su tako, uzela sam onako gledajući ove troškove, samo da vidim, mislim oni fantastično stoje. Činjenica da ovo treba izglasati, jer ovo je preduzeće koje jedno i jedino, može se reći, u Varešu da posluje sa ovakvim uspjehom. Ali baš zato kontra tome, hoću da kažem da ne može ni da nas krivi, jer gledajte, ako se uzmu ovi pokazatelji od prošle godine i ove, evo odmah, odmah možemo početi od troškova naknade za članove Nadzornog odbora i Skupština. Prošle godine je uplaćeno 10.594, ove, pretprošle, prošle 14.347 maraka. Znači, da su oni čak i povećavali to, što na drugim mjestima ja to nisam nigdje ni vidjela ni čula. Ili recimo, troškovi reprezentacije, uzmite 8.318, prošle godine 7.938. Koliko imamo mi u Općini, koliko načelnik potroši. Ili kaže, ostali troškovi poslovanja kao što su stručno usavršavanje, pretplata na stručna izdanja i tako dalje. Ovdje je činjenica prošle godine manje, ali se ja pitam u ovoj situaciji, pa jel ovo Kembriđ ili je ovo komunalno preduzeće. Zatim još sam nešto vidjela, gdje sam to... ne mogu sad da nađem to ... sve u svemu mogu da kažem da po svemu ovome ne mogu sad da sve ovo pratim, da je ovo što je ovdje iskazano, da je počev od dobrih plaća, zatim od ovoga svega što sam uporedila, da ne mogu i

nije pošteno da oni sad nas okrivljuju da smo mi nekakvi saučesnici u tome dugu što imaju neraščišćenih računa sa Dabravinama. To mislim, evo sad, uvijek je kolizija ovdje. Jedni kažu ovo drugi kažu ono, Komunalno se drži svojih nekakvih principa. Mislim da nisu u pravu nimalo, nimalo nego uzmite samo ono, onaj dodatak koji se i dan danas piše na našim računima za ona mjesta, što kažu nije to uopće Vijeće donijelo, nego je donijela njihova Skupština i ne znam Nadzorni odbor. Tako da se oni, mislim da se vrlo komotno ponašaju. Toliko.

Predsjedavajući OV Josip Malbašić: Zahvaljujem gospođi Zlobec. Izvolite dalje. Gospodin Nihad Parić.

Vijećnik Nihad Parić: Ja imam jedno zapažanje, u stvari moram da nešto kažem, jer ne mogu kad je Komunalno preduzeće u pitanju, ja ne mogu da nešto ne kažem. Imam ja i hvala, međutim, kaže doktorica, menadžer, pa ekonomista i menadžer doktorice diploma je to. To je stvarno diploma. ...

Predsjedavajući OV Josip Malbašić: Molim vas.

Vijećnik Nihad Parić: ... al' pazite nešto, da odete u privatnu firmu pa da se prijavite na konkurs, znate vi koliko ih otpadne. Od dvadeset primljenih jedan, to su opasni testovi, to su testiranja, ja to znam. Sad dalje idemo, molim vas, molim vas, ne ne , ne treba što će ti replika, ja pričam samo ovaj na Vaše što ste rekli da je menadžer. Ja kad pogledam ovdje broj zaposlenih radnika, pedeset jedan, pazite, u jednoj privatnoj firmi od pedeset jedan, osam nekvalifikovanih, pa neću dalje o kvalifikaciji. Dvanaest viša stručna sprema, visoka stručna sprema, znači ovdje je bilo osam ... osamnaest nekvalifikovani, jer treba pogledati te ljude kad vucaju te kontejnere, dvojica imaju. Ti se sažališ nekad, na nekom mjestu gdje je nedostupno autu smečari da priđe, kako oni to siroma vukljaju. Znači, četvorica ih trebaju. Ima ih puno u kancelarijama znate, sad kad bi se ovo podijelilo, realizacija bi bila daleko još bolja. Revizor, revizor uzme pare, uzme on izvještaje ove, nije samo to u Komunalnom preduzeću nego u svakom preduzeću. Revizorovo je da uzmu pare i vidjeli ste na višim nivoima revizorskih timova šta su uradili. Na kraju pojeo vuk magarca, nema nikakvih rezultata od tog. Znači, nema veze što je revizor, što je revizor ovdje. Vidjeli smo mi koji su nameti bili na poskupljenje vode. Znači, hvala Bogu radnici su ostvarili svoje lične dohotke u protekloj godini i ovaj, ostvaren je i nekakav vid dobiti što je pozitivno. Malo je tih firmi koje imaju na kraju godine takve rezultate. Međutim, da neko kaže ko što kaže Ivan Lučić da mi nemamo u gradu čoškova, i te kakvih. Ja ne znam ko ih treba čistiti. Trebam li ih ja čistiti. Ja ću očistiti ono što je ispred mene, ispred mog poslovnog prostora i mojih objekata. Međutim, vi ste vidjeli zimsko održavanje šta se radilo. Građani su čistili sami brate po gradu i više nego što su trebali. Da, ima još što se može uraditi, međutim kako uraditi, kako uraditi sa ovih osam radnika. Veoma teško, vrlo teško. Uvijek ću stavljati primjedbu na strukturu zaposlenih u Javnom preduzeću. Nije to samo Javnom preduzeću Komunalno imamo mi još Javnih preduzeća, gdje imamo ovakvu situaciju, osam ovdje bi uvijek ja stavio osamnaest. Toliko.

Predsjedavajući OV Josip Malbašić: Zahvaljujem gospodinu Pariću. Gospodin Elvir Rožajac.

Vijećnik Elvir Rožajac: Pa kao građanin, što se tiče komunalnih usluga u gradu koje redovno izmirujem, pošto imam stan ovdje u Varešu, zadovoljan sam, ali na selu nisam zadovoljan. Zadnje je bilo, mislim vezano za vodu , ono, nalazi vode. Ne znam da li je pijem ispravnu. Kad odem na selo malo se razbolim, pa dođem u Vareš pa ozdravim, pa tako ne znam i da li pijem šta ispravno gore ili ne pijem. Što se tiče ovdje, samo meni nije jasno, ne znam da li vama ostalim vijećnicima, kad revizija neka radi neki izvještaj iz finansijskog poslovanja, kaže dug za struju, dug za struju se otpisuje nema ga, a sve piše tamo dvjesto hiljada dugujem, toliko su priznali, pa su se dogovorili i dug se sklanja. A dug se mora izmiriti, dug je dug. Dug prema Elektro distribuciji ostaje i on se mora u Izvještaju prikazivati svake godine. Meni ovo nije jasno. Nisam neki matematičar bio u školi, ali zaista kad vidim ovo, ono skontam koliko je dva i dva. Hvala.

Predsjedavajući OV Josip Malbašić: Zahvaljujem gospodinu Rožajcu. Izvolite dalje. Gospodin Džemo Kevrić.

Vijećnik Džemo Kevrić: Pretprošle godine, znači 2010., kada smo usvajali ovaj Izvještaj, moja malenkost, govorio sam o pregledu prihoda i rashoda za 2009. godinu. I tada sam rekao da u

Izvještaju treba da stoje uporedni pokazatelji onog što smo usvojili kao plan i onog šta je realizovano. Nije bilo komentara prošle godine o Izvještaju za 2010. godinu ovdje na ovom Vijeću, prošao je Izvještaj takav kakav je prošao. Nisam imao namjeru ni da se danas javljam po ovoj tački dnevnog reda, ali za uzgred vama svima, malo preskačemo po pojedinim stavkama, odnosno hoću da kažem konkretno, opet se vraćam na tu neku metodologiju. Kad pogledam strukturu zaposlenih, bogami, tamo ima svašta, nije svašta nego ima stručni kadar dobar, a Izvještaj nam ovakav dostavljaju o samo utrošenim sredstvima. Znači, uzmi koliko ti drago. Ne vidimo ono što je planirano, ali hvala Bogu, vidimo uporedne pokazatelje koje su nam ovdje prikazali 2010-2011 godina. I tu se vidi upravo ono što je doktorica Jelena govorila. Što nisu prikazana planirana sredstva. Struktura prihoda, ovdje je na neki način, interesantna je. I trebali bi da znamo strukturu prihoda, porezi i doprinosi, doprinosi, doprinosi koliko znam u materijalno finansijskom poslovanju su samo prikazani jedanput. Ona stavka nosi doprinosi svi koji su plaćeni na jednoj stavci, ne mogu se prikazivati na dva mjesta. To je prikazano u ovome pregledu rashoda za 2011. godinu. Takođe, ako ima stavki, a to nam se ponaša, ponavlja iz prethodnih godina, kaže, ostali rashodi i rashodi iz ranijih godina. Dajte gospodo draga, ako su, konkretno sad za ovu godinu, znači, svi prethodni rashodi iz prethodnih godina su očišćeni, nema ih više. A svake godine prilikom ovog Izvještaja ima stavka iz prethodnih godina. Dokle ćemo čistiti prethodne godine. Ili, zašto se odmah svi ne prikažu. Pitanje... ima li rashoda, ovo čisto onako mene interesuje radi poslovanja firme, da li ima rashoda koji su prikazani u ovim rashodima, a nisu realizovani, nisu plaćeni u 2011. godini. Ovo govorim iz tog razloga da ne bi opet bila stavka, da ne bi bila stavka ostali rashodi, ostali rashodi, to je možda, jel' bara-bara samo da bi firma poslovala, poslovala pozitivno. Ne sumnjam ja u ove podatke, ali sumnjam u ovu stavku rashodi iz prethodnih godina, pa se uvijek tereti prethodne godine, kako bi ova godina protekla pozitivno. Ja sam mislio još nešto kod finansijskih pokazatelja, al' bi opteretio vas, išao sam od stavke do stavke. Pa zar tri člana Upravnog odbora i koliko članova Skupštine, toliko da nose sredstava. Nose jer nisu ni prikazana ona planirana sredstva koja su bila. Vidimo bogami, da ima jel' pozamašno, tri člana Upravnog odbora i pet-šest članova Skupštine, tolika sredstva. Kad sam dijelio, kad sam... šest članova, eto čujem sad, kad sam dijelio i ova sva ostala sredstva u odnosu na broj zaposlenih, zar se može prikazati nešto u odnosu na broj zaposlenih da iznosi 350,80, ne, ne može,... ako je onda, iznosi su u svijuu jednaki, ... ili neki dobiju više ili neko dobije manje. Al' bi trebalo konkretno, kod onih stavki, neću ih sad govoriti, to nek' nađe predlagač, ove greške svoje. Nek' vidi, onda se dijelimo i tu neko može dobiti 340 a neko 350 a neko će i 400, pa smo u prosjeku, jel' jedni jedemo meso, jedni kupus.. jedemo sarmu, ne. I na kraju ponovo bi želio da se ova stavka koju sam se nje lično, onaj konkretno dodirnuo, doprinosi i broj uposlenih i strukturu njihovu zaposlenih, mislim da ovaj pregled, ovaj pregled prihoda, pazite, prihoda u 2011. godini, treba sa sobom da nosi i plan koji smo mi ovdje usvojili za tu godinu.

Predsjedavajući OV Josip Malbašić: Zahvaljujem Gospođa Tajiba Brkić.

Vijećnica Tajiba Brkić: Ma ne mogu da ne kažem da su radnici uposleni u JKP veoma dobro izvršavali sve svoje poslove i zadatke i s toga, sa moje lične strane sve pohvale. Ljudi su se angažovali u svim pravcima, počev od zimskog održavanja, od odvoza smeća. Znači, kao što je rekao gospodin Parić, sa onoliko malo ljudi, ipak ovako dobro poslovanje. Ja čestitam Hvala.

Predsjedavajući OV Josip Malbašić: zahvaljujem gospođi Tajibi. Izvolite dalje. Gospodin Mato Pavić.

Vijećnik Mato Pavić: Evo, namjerno sam ostavio da budem zadnji, ovaj, mislim eto među zadnjim, pošto se ne bi puno osvrtao na ovo Izvješće. Bože moj, revizorska kuća je dala svoje mišljenje. Finansijski pokazatelji pokazuju pozitivna stvar, a i ja, moje osobno mišljenje da sam, da sam relativno znači zadovoljan sa uslugama, sa komunalnim uslugama. Međutim, htjeo sam ovdje reći samo par stvari, da kažem, ajde, moje neke primjedbe na komunalne usluge. Spominjao sam to već, ja mislim, na prije, prije par sjednica, ne znam koja je bila točka dnevnog reda, pa sam to, iskoristio sam prigodu da to kažem. Pa evo i sada ću opet ponoviti. Ja kao građanin i građanin Selišta u Varešu, nismo baš, ovaj, najzadovoljniji sa komunalnim uslugama, jel' bi se najvjerovatnije mogle popraviti. Prva stvar eto koju sam htjeo reći, znači broj kontejnera. Kad se krene sa regionalnog puta pa prema Selištu, mi imamo mali broj kontejnera. Vjerovatno to i sami... svjesni ste toga.. dva, četiri, šest, meni se čini. A u to recimo, pored ostalih stambenih objekata uključene su jedna, dvije, tri, četiri, pet zgrada. Znači, mislim da bi se to moglo popraviti i da se poveća broj kontejnera i da se malo

redovitije odvozi smeće. I drugi problem je, problem ulice Selište koja ide, koja se odvaja desno od one tri stambene zgrade. Mi smeće moramo odložiti, znači negdje. Dolazi jednom u sedam dana, dolazi kombi koji vuče smeće il' već nekakav kamion. Šta bude. Znači, mi smo sad prisiljeni ili da nosimo smeće do najbližih nam kontejnera ili da to smeće stavimo negdje onako u kesama, što normalno razvlače tvarno mačke i psi i onda to nije u redu. Moj je prijedlog da se za taj dio grada nabave, znači one na primjer, one kante. Ja ne znam već od koliko su, 200 litara, one zelene i znači neka se svako domaćinstvo zaduži sa tom kantom koja bi se onda praznila, nema veze, opet u sedam dana. Toliko. Hvala.

Predsjedavajući OV Josip Malbašić: Zahvaljujem gospodinu Paviću. Izvolite dalje. Vidio sam Grga, dobit ćeš riječ, sačekaj malo, strpi se da vidimo imali još neko voljan. Ti kao predstavnik predlagача ćeš na kraju, šlag na tortu da staviš. Ima li još voljnih za učešće u raspravi. ... Ja ću samo kratko, ovaj u principu, ovaj, mislim da su neki od nas se malo zanjeli o nebitnom. Kad cijenimo ovo Izvješće treba da neke stvari ne gubimo iz vida. I ne možemo sa sebe skidati odgovornosti. Ipak, je ovo Vijeće odgovorno i načelnik za funkcionisanje ovog Javnog poduzeća, što direktno što indirektno. Direktno kroz Odluke koje je donijelo, jer nije JKP svojevolumno otišlo u Dabravine, nego je otišlo na osnovu Odluke ovog Vijeća a prijedlog je bio načelnikov. Znači, te stvari, ne smijemo prelaziti preko njih teka onako. Druga stvar, treba cijeniti u kojoj mjeri oni realiziraju plan koji je usvojilo ovo Općinsko vijeće dok je bilo u funkciji Skupštine JKP. Po meni oni u dobroj mjeri su do sad realizirali taj plan koji nam je tada prije nekoliko godina predložen i koji je Vijeće usvojilo dok je bilo u toj funkciji. Treće, indirektno utičemo i na način što smo im odobrili Skupštinu poduzeća, znači odabrali smo i dali povjerenje određenom broju ljudi da vodi računa o tom. Četvrto, indirektno, preko Komisije za izbor u regulirana tijela, biramo im i Nadzorni odbor, znači i tamo smo dali povjerenje ljudima koji će nadzirati da li se to sve... tako da mi ne možemo se amnestirati od odgovornosti za njihovo uspješno ili neuspješno poslovanje. U velikoj mjeri, mi svojim Odlukama, što direktno ili indirektno utičemo na njihovo poslovanje. Druga stvar, ovdje se već duže vrijeme, imam dojam, lobistički nastoji uništiti ovo Javno poduzeće. Nekome smeta, mislim da tu ima raznih mešetarenja, očito nekome smeta što oni uspijevaju se održati na tržištu i uzimati po prilično veliki dio kolača privatnim firmama kroz izvođenje radova na održavanju, što ljetnog što zimskog, regionalnih puteva, što izvođenjem radova na izradi nove vodovodne infrastrukture i kanalizacione i slične stvari. Mislim da to nekome direktno ne odgovara, pa mislim da i s te strane treba, ovaj, gledati na, kroz ovo sve. Neko bi izgleda volio da imamo JKP u stečaju kao što je bilo u Olovu ili u Visokom, da budemo zatrpani gomilama smeća. Svi ovi problemi koji su izneseni, manje-više su tehničke naravi i oni se kroz kontakte sa komunalnim inspektorom ili menadžmentom JKP mogu na bezbolan način riješiti. Ono što je bitno sadržano je ovdje u ovim brojkama, a one su, koliko vidim, prihvaćene od Nadzornog odbora, prihvaćene od Skupštine kao takve i prihvaćene i od ovlaštene revizorske kuće. I s te strane ja smatram da ne bi bilo korektno iskazati nepovjerenje makar ovima koje smo mi birali direktno da nadziru ovo Javno poduzeće, pogotovo što je ovdje evidentno uspješno poslovanje, a ostaje na nama obaveza da razriješimo sve ove probleme u koje smo ih mi svojim Odlukama doveli. Toliko od mene. Gospodin Jasmin Salketić.

Vijećnik Jasmin Salketić: Replika predsjedavajućem. Mislim da nije korektno, koristite funkciju predsjedavajućeg i po svakoj tački dnevnog reda date komentar na sve ono što je neko rekao. Ja bi volio, kad bi Vi, Vi ste vijećnik kao i svi mi, kad bi nekad uzeli prvi da diskutujete ili drugi, a ne zadnji i onda svima lekcije dijelite na svoj način. Toliko.

Predsjedavajući OV Josip Malbašić: Gospodine Salketiću, a ko je rekao da sam ja zadnji. Jesam li ja zaključio raspravu. Molim Vas, ovo sad ja moram Vama replicirati. Nemojte iznositi neistine, ja raspravu nisam zaključio i nikome nisu zaključana vrata ni put ka ovoj govornici. Svako od vas ima na to pravo. A to kad ću ja nešto reći, reći ću kad ja smatram za shodno, a nije kad se vama prohtije da ja nešto kažem. A Vi ako imate nešto reći, izvolite, poslije mene nikom nisu vrata zaključana. Gospodine Kenan Kamenjaš, je li replika.

Vijećnik Kenan Kamenjaš: Gospodine predsjedavajući, Vi ste jedan od glavnih aktera krivca dešavanja, ovaj, situacije u Dabravinama. Znači, i nemojte to prebacivati na nekoga. Predsjedavajući ste Vijeća i vičete neko, neki .. Vi ste znači glavni i Vijeće. Toliko.

Predsjedavajući OV Josip Malbašić: Gospodine Kamenjaš, sad ja Vama moram da repliciram das moram ja Vama da repliciram. Ja sam odgovoran u onoj mjeri koliko i Vi, znate, jer ja imam jedan glas kao i Vi. I nisam ja ovdje dovodio vijećnike u zabludi, da sam izjavljivao da po prvi put imam uredno snadbijevanje vodom kako je Javno komunalno preuzelo vodovod u Dabravinama. To su Vaše riječi, možemo ih preslušati sa audio zapisa i Vi ste, ako iko, onda učestvovali u obmani ovih vijećnika. I Vi kao mještanin Dabravina snosite daleko veću odgovornost nego bilo tko od nas vijećnika. A to što ste Vi kasnije, zbog ovih ili onih razloga, promijenili svoju priču, to je druga stvar. Izvolite.

Vijećnik Kenan Kamenjaš: Gospodine predsjedavajući. Moj je stav uvijek isti, ja ga ne mijenjam, ali Vaši prijedlozi nisu korektni. Jer Vi imate pravo, zato i govorim da ste jedan od glavnih aktera. Vi dajete prijedloge.

Predsjedavajući OV Josip Malbašić: Čega.

Vijećnik Kenan Kamenjaš: Ma znate Vi o svemu što smo pričali u proteklom periodu. Od kalkulatvinih cijena, ekonomskih, političkih, od Vaših prijedloga, nekih dijeljenja vode u Dabravinama, vodovoda, sve je to iz Vaše glave. Nije to iz ljudi, jer Vi dajete konačan prijedlog. Nemojte molim Vas. A moj je stav isti od prvog do današnjeg dana. I nemojte, mislim, Vi sada mene prozivate. Jest ovo izborna godina, a ja Vas molim da budemo korektni do kraja.

Predsjedavajući OV Josip Malbašić: Gospodine Kamenjaš, ja opet moram replicirati. Vi sad doista, molim vas....., Vi sad doista bezobrazno lažete i obmanjete ovdje javnost. Ja nikada nisam bio predlagač ... molim vas... molim vas strpite se Molim vas ... pa šta , ...kako drugačije da kažem kad čovjek svjesno laže za govornicom. Gdje sam ja..., gdje sam... gdje sam se ja gospodine Salketiću pojavio kao predlagač nekog od ovih akta. Vi to znate..dobro i svejsno lažete... je li... pa jesam li ja...kako da mu ne kažem, pa jel to ovdje rekao jasno za govornicom. Šta treba da mu kažem drugo, on je toga debelo svjestan.... Uopće ja ne miniram sjednicu, minirate je vi. Gospodin Mato Pavić..... Molim vas... Hoćete li govorit, imate li potrebu da kažete onda dignite ruku pa se javite.

Vijećnik Mato Pavić: Ma nije rep..., ustvari jest replika, znači da mogu izaći. Evo sad Majda lijepo reče, onaj, nek' nismo mi, pa i nek' nismo. Ovaj, pa sad kažem opet, ovaj, da i ja, eto, da sad malo prekinemo, da smirimo tenzije, mada ne bi stao baš ni jednoj stranu, ovaj, da kažem da je neko u pravu, da je neko u pravu ili nije. A maloprije sam htio reći al' mislio sam povuče to isto tako replika, ali eto sad ću to reći. Ovaj, mislim, hoću da se našalim. Ako će ičim biti obilježen ovaj mandat, pošto smo već spominjali mandate. I kolega Marošević je spominjao ovaj naš vijećnički mandat. Kad bude negdje pisalo šta smo mi radili za ove četiri godine, možda će sve ostalo negdje ostati po strani, a glavno će nam bit vodovod Dabravine koji se proteže, ja mislim, od već druge godine i ja bih iskreno, bio zadovoljan kad bi taj problem do našeg, do kraja naših mandata, kad bi bio riješen. Hvala. Toliko.

Predsjedavajući OV Josip Malbašić: Zahvaljujem gospodinu Paviću. Gospodin Abdulahović.

Vijećnik Ismet Abdulahović: Ja ću prvo repliku gospodinu predsjedavajućem, da kažem da Općinsko vijeće Vareša nije izabralo Nadzorni odbor niti Skupštinu, nego je to načelnik po svojim prijedlozima. To znači da skinemo teret s ovih ljudi ovdje. Druga stvar, mi se nismo bavili vodovodom Dabravine, već smo se mi bavili da se Dabravine ne razvijaju nigdje, neg' da se bavimo samo problemima vodovoda da ne bi Dabravine dobile igralište gdje ima preko sto pedeset omladinaca, e toliko gospodine Paviću. I to je namjerno rađeno.

Predsjedavajući OV Josip Malbašić: Zahvaljujem gospodinu Abdulahoviću. Ima li još voljnih za učešće u raspravi. Gospođica Dženana Bešić.

Vijećnica Dženana Bešić: Obzirom na trenutnu situaciju i pretpostavljam izjašnjavanje predlagača predstavnika firme, ja tražim pauzu od petnaest minuta za konsultacije unutar Kluba, obzirom da je rasprava žučnija bila u odnosu predsjedavajućeg prema vijećnicima i obratno, nego o samom Izvještaju, pa ćemo se izjasniti kada se vratimo i dati priliku ljudima da se obrate.

Predsjedavajući OV Josip Malbašić: Zahvaljujem. Petnaest minuta pauze....

Predsjedavajući OV Josip Malbašić: Dame i gospodo vijećnici, nastavljamo sa radom. Gospodica Dženana Bešić ima riječ.

Vijećnica Dženana Bešić: Evo budući da sam ja u ime svojih kolega tražila pauzu, a ono što sam konstatovala da ne ponavljam tu... činjenicu da je rasprava otišla u pogrešnom smjeru. Međutim, obzirom da imamo tačku na raspravi, želimo da se izjašnjavamo o njoj, želimo da saslušamo predlagачe, ali isto tako želim da zamolim gospodina predsjedavajućeg da obzirom na Etički kodeks, obzirom na aktuelnu situaciju, obzirom na činjenicu da se ova situacija ponavlja iz sjednice u sjednicu, da riječ bezobrazan, koristite veoma lahko da okarakterišete kolege vijećnike, ja sam jedna od tih. Danas ste kolegi Kamenjašu izrekli tri stvari koje nisu nikako u redu. Vi ste konstatovali da čovjek spava, da je bezobrazan i da laže, što nikako nije za jednu običnu konverzaciju na ulici ili na hodniku, a kamoli za govornicom sa pozicije predsjedavajućeg Općinskog vijeća. Podsjećam, dešavalo se i ranije, jutros prilikom postavljanja vijećničkih pitanja, sugerisali ste isto tako neprimjerene stvari gospodinu Rožajcu. I ja Vas molim zaista da se izvinete svim tim ljudima i nama kolegama i da kontrolišete te svoje riječi u smislu da, zaista nije u redu, nije korektno, nije profesionalno i nije etički, da snaga i jačina glasa ne može biti ekvivalent snazi argumenta da se razgovor nastavi i da se donesu dobri zaključci, da ne radimo ono što se dešava, a čemu Vi zaista dajete svoj najveći doprinos. U tom smislu, ja Vas molim da se izvinete kolegama.

Predsjedavajući OV Josip Malbašić: Jeste li završili.

Vijećnica Dženana Bešić: Jesam.

Predsjedavajući OV Josip Malbašić: Izvolite, vratite se na mjesto. Moram da repliciram. Ovo Vaše izlaganje je vrlo jednostrano. Nisam čuo da ste zamolili svoje kolege da ne čine ono što čine, čime izazivaju takvu reakciju. Ukoliko smatrate da postoji potreba, imate Etički kodeks i možete postupiti u skladu sa njegovim odredbama. Izvolite.

Vijećnica Dženana Bešić: Etički kodeks postoji i on važi kako za predsjedavajućeg tako i za sve nas ostale. Ja sam sad na Klubu rekla svojim kolegama u SDA da ne želim potencirati ovo pitanje kao predsjednica i član Etičke komisije, jer postoje moje kolege koji isto tako trebaju o tome odlučivati, nego zaista, ovo pitanje povačim, kao kolegica vijećnica i u tom smislu Vas molim da se izvinete kolegama i naglašavam ovo molim, jer sa svoje strane i u ime svojih kolega smatram to najpristojnijim i najkorektnijim. Niko od njih danas, ni gospodin Rožajac, ni gospodin Kamenjaš, niti ja prošli put, nije Vas okarakterisala kao bezobraznu osobu, osobu koja spava, osobu koja laže.

Predsjedavajući OV Josip Malbašić: Zahvaljujem. Izvolite dalje... Molim vas jesam li ja bio dovoljno jasan. ... kako da nisam. Rekao sam Vam, ne smatram uopće za shodno da se izvinjavam, jer nisam čuo ni od koga od vas da se pokušao izvinuti za ono što je uradio i što je rekao. Izvolite.

Vijećnica Dženana Bešić: Dobro. Zaista se niko ne može natjerati na nešto zašto je zamoljen, a ne želi to da uradi, bez obzira koliko smo mi svejsni da je učinjeno to što je učinjeno. Uglavnom, čovjek je gospodar svoje riječi dok je ne kaže, a kad je kaže onda je ona njegov gospodar, i sve ovo što je s Vaše strane učinjeno danas i to što se ne želite izvinuti, više govori o Vama nego o svemu ostalom.

Predsjedavajući OV Josip Malbašić: Zahvaljujem Predizborna, izgleda je počela odavno. Molim vas, idemo dalje sa radom. Ima li još volju neko od vijećnika da učestvuje u raspravi o predmetnoj tački dnevnog reda... Pošto nema, onda riječ dajemo gospodinu Grgi Vukančiću, predsjedniku Skupštine Javnog komunalnog poduzeća.

Predsjednik Skupštine JKP d.o.o. Vareš Grga Vukančić: Sve vas skupa pozdravljam i želim reći samo par riječi. Prvo, iz ove sale treba da se sve one..., međuljudski odnosi iznesu napolje, da se ne dešavaju ovdje. Mi smo na Skupštini, koja je održana prije par dana, detaljno razmotrili ovaj

Izvještaj financijski za 2011. godinu i dali mu zeleno svjetlo da je urađen korektno prema poslovanju. Ništa nije tu , ovaj , modificirano ili nešto izmijenjeno. Prema tome, ako neko misli da nije u redu , ima drugi način. Neovisni revizor je bio i utvrdio stanje da je sve O.K.. Prema tome, predlažem da ,ovaj, ova točka ide na glasanje i da se da, ovaj prolazna ocjena. Ako neko misli il' ako je, da je neko slučajem, ovaj, mjesto Kamenjaša Zafera direktor, bilo koje ime, da ne bi bilo ovakve diskusije. A sve te vaše međuljudske odnose sa Zaferom, rješajte izvan ove sale. Mislim da bi to bilo korektno. Hvala.

Predsjedavajući OV Josip Malbašić: Zahvaljujem gospodionu Vukančiću. Ima li još voljnih za učešće u raspravi... Pošto nema, zaključujem raspravu, stavljam Izvješće na glasovanje. Ko je za neka digne ruku.... Zahvaljujem, protiv....

Sekretar OV Leon Pavlović: Ti žuti digao. Što ...

Predsjedavajući OV Josip Malbašić: Molim vas, dignite to ... zahvaljujem. Suzdržanih... Rezultati... Zahvaljujem. Konstatiram da je sa **13 glasova „ZA“, 6 „PROTIV“ i 1 „SUZDRŽANIM“ usvojeno**

***Izvješće o radu i financijskom
poslovanju JKP d.o.o. Vareš za 2011. godinu.***

Ad. 6.

*(Informacija o provođenju Odluka Općinskog
vijeća Vareš o davanju na upravljanje i korištenje
vodovoda Mjesnih zajednica, JKP d.o.o. Vareš .)*

Predlagač nije imao dodatno objašnjenje za ovu tačku dnevnog reda.

Otvorena je rasprava u kojoj su svoje prijedloge, primjedbe, sugestije i mišljenja iznijeli vijećnici: Elvir Rožajac, Džemo Kevrić, Jasmin Salketić, Ismet Abdulahović, predsjedavajući OV Josip Malbašić i direktor JKP d.o.o. Vareš Zafer Kamenjaš koji je odgovorio na neka pitanja vijećnika postavljena u raspravi.

Zaključena je rasprava i predsjedavajući OV predložio je Vijeću da primi k znanju Informaciju o provođenju Odluka Općinskog vijeća Vareš o davanju na upravljanje i korištenje vodovoda Mjesnih zajednica, JKP d.o.o. Vareš uz prijedlog

Zaključka

- **Obavezuje se Općinski načelnik da u saradnji sa Savjetom mjesne zajednice i građanima MZ Dabravine pripremi prijedlog Odluke za rješenje problema vodovoda u MZ Dabravine, općina Vareš.**

Za riječ se javio pomoćnik načelnika Ermin Musa koji je dao kratak komentar na sprovedene procedure u vezi Odluka o kojima se raspravljalo na Vijeću a koje su vezane za vodovode u MZ Dabravine.

Nakon izjašnjavanja vijećnika predsjedavajući OV konstatuje da sa **8 glasova „ZA“, 3 glasa „PROTIV“ i 9 „SUZDRŽANIH“ glasova predloženi prijedlog nije dobio potrebnu većinu glasova.**

Ad. 7.

*(Informacija o provođenju lokalnog ekološkog
akcionog/akcijskog plana za općinu Vareš u 2011. godini.)*

Predlagač nije imao dodatno objašnjenje za ovu tačku dnevnog reda.

Nije bilo rasprave po ovoj tački dnevnog reda i predsjedavajući OV predložio je Vijeću da primi k znanju Informaciju o provođenju lokalnog ekološkog akcionog/akcijskog plana za općinu Vareš u 2011. godini.

Nakon izjašnjavanja vijećnika predsjedavajući OV konstatuje da je sa **19 glasova «ZA» i 1 „SUZDRŽANIM“ glasom primljena k znanju**

Informacija o provođenju lokalnog ekološkog akcionog/akcijskog plana za općinu Vareš u 2011. godini.

Ad. 8.

(Informacija o minsko-eksplozivnim sredstvima i poduzetim aktivnostima Općine na deminiranju prostora na području općine Vareš.)

Predlagač nije imao dodatno objašnjenje za ovu tačku dnevnog reda.

Otvorena je rasprava u kojoj su svoje primjedbe, prijedloge, sugestije i mišljenja iznijeli vijećnici: Elvir Rožajac, Tajiba Brkić i ispred Službe za civilnu zaštitu Ismet Kozlić koji je dao kratko pojašnjenje za ovu tačku dnevnog reda.

Zaključena je rasprava i predsjedavajući OV predložio je Vijeću da primi k znanju Informaciju o minsko-eksplozivnim sredstvima i poduzetim aktivnostima Općine na deminiranju prostora na području općine Vareš.

Nakon izjašnjavanja vijećnika predsjedavajući OV konstatuje da je sa **20 glasova «ZA» primljena k znanju**

Informacija o minsko-eksplozivnim sredstvima i poduzetim aktivnostima Općine na deminiranju prostora na području općine Vareš.

Ad. 9.

(Izveštaj o provođenju trogodišnjeg Općinskog akcijskog plana za kontinuirano unapređenje općinske uprave i pružanje usluga u suradnji s Projektom upravne odgovornosti.)

Predlagač nije imao dodatno objašnjenje za ovu tačku dnevnog reda.

Nije bilo rasprave po ovoj tački dnevnog reda i predsjedavajući OV stavio je na izjašnjavanje Izveštaj o provođenju trogodišnjeg Općinskog akcijskog plana za kontinuirano unapređenje općinske uprave i pružanje usluga u suradnji s Projektom upravne odgovornosti.

Nakon izjašnjavanja vijećnika predsjedavajući OV konstatuje da je sa **20 glasova „ZA“ usvojen**

Izveštaj o provođenju trogodišnjeg Općinskog akcijskog plana za kontinuirano unapređenje općinske uprave i pružanje usluga u suradnji s Projektom upravne odgovornosti.

Ad. 10.

*(Plan razvoja poljoprivredne
proizvodnje na području općine Vareš.)*

Predlagач nije imao dodatno objašnjenje za ovu tačku dnevnog reda.

Nije bilo rasprave po ovoj tački dnevnog reda i predsjedavajući OV stavio je na izjašnjenje Plan razvoja poljoprivredne proizvodnje na području općine Vareš.

Nakon izjašnjenja vijećnika predsjedavajući OV konstatuje da je **sa 18 glasova „ZA“ i 1 „SUZDRŽANIM“ glasom usvojen**

*Plan razvoja poljoprivredne
proizvodnje na području općine Vareš.*

S obzirom na opravdano odsustvo Općinskog načelnika da prisustvuje u daljem toku sjednice i učestvuje u radu po tački 11. „Tekuća pitanja“ dnevnog reda 39. sjednice, predsjedavajući OV je u skladu sa članom 3. stav 1. Poslovnika o radu OV zaključio rad 39. sjednice OV i izvijestio Vijeće da će se akti pod tekućim pitanjima razmatrati na 40. sjednici OV.

Sjednica je završena u 13 sati i 55 minuta.

SEKRETAR

Leon Pavlović

PREDSJEDAVAJUĆI

Josip Malbašić

ZAPISNIČAR

Azra Ibrahimović